

解文毅公集




解文毅公集卷十二

墓表

翰林院修撰王欽止先生墓表

嗚呼功業既成而人推服之恩惠及人而人懷思之天下皆是也無功業而人推服無恩惠而人懷思古今天下之人甚少也若漢之賈誼唐之劉蕡其功業何所成恩惠何所及其文章亦甚少也然使人思而嘆息之至今推服之無異辭豈世之人惜俊才之夙成悲壯志之蚤謝歟抑憫其不遇於世而以窮死歟予友翰林修撰王君欽止諱艮歿



之日識者皆嘆息推服而懷思之其朋友哭之盡
哀即未與接者亦聞而嘆息失聲此足見人心之
公而行之孚於人者久也君少失父自知讀書爲
文其祖與畊先生治尚書學聞天下著書經管見
藏於家矜式主意四書經疑貫通能發前人所未
發兩漢詔誥咸梓於世君盡其微爲學愈勵而家
事未嘗廢雖甚攻苦必親理之其母以君篤於孝
君被病即告母曰我病且死幸有第三人在我無
足哀夭壽命也其母以爲達於理言不及妻子此
誠人情所難先是父歿時弟俱幼今得成立皆以

爲君篤於慈其族人親戚無間言皆以爲宗族稱
孝鄉黨稱弟方其在府學課試輒冠曹人不以爲
忌試江西鄉薦第一上親灑宸翰魁名天下賜進
士及第授翰林院修撰未幾設文史館待之晉秩
一等分類秘閣書目預修高廟實錄總集類要祁
寒盛暑終日不怠與胡廣等奏修時政記如故事
參酌攸當屢上書言當時切務上皆欣然納之飭
身正色不可狎玩聽其言侃侃如也然未嘗妄言
其所不可行自奉甚約調急如將不及與人交久
而益敬其行孚於人也類如此獨其於死生之際

從容安泰無毫髮可憐之色預與母訣斂手待終
予往視之一辭不亂此足以信其平生所蘊非淺
智之所能度者宜其感動衆人猶醴泉之浸不必
爲江河芝草之榮不必爲松栢而人信以爲祥洵
乎功業恩惠未嘗顯著而人重其生存哀其沒世
同於賈誼劉蕡也君文章雄偉光耀常曰悖於理
而工於辭者非不知理悖也欲希世而盜名也吾
切耻之詩詞古雅一以理爲主警策淵永字畫精
楷皆稱其爲人其稿若干卷藏於家皆可傳也君
連世與予家友善其伯祖吾素嘗爲館京師待我

先祖真我公後爲翰林編修國子博士卒於官家
君在太學爲之心喪以禮葬之其祖諱克耘與予
叔祖觀我求我同舉進士克耘號野耕元統癸酉
科甲授吉安府同永新州事其族父無將與予同
登洪武戊辰第君與予弟文夫已卯同舉於鄉知
其族行莫予若也是宜爲表而繫以辭刻之其墓
君爲吉水帶源王氏唐末由袁之白芒來其先太
原人也曾祖諱孟贈萬安縣尹祖妣曾氏贈宜人
父諱其尹避地吉安城中千戶宋以女孫女焉是
生君年十六母氏與歸帶源娶沙田劉氏戶部主

事芸庵先生之女子男三人瑩錚鏌墓在高嶺園
之原君生洪武戊申六月十五日歿辛巳九月七
日也天子命治其喪者其妻之姑夫顏君子明也
系之以詩

其辭曰頎修容兮內正直勇往義兮不組飾少孤
立兮炳文章篤孝友兮譽彌芳超騰驤兮陟天路
希聖哲兮同軌度火始熖兮泉發蒙防讀葬兮遭
回風朋情鬱紆兮凜秋日高欲濟無梁兮遊水滔
滔華芝殞兮醴泉竭靈徵長兮旨芳歇彼力渺兮
任乖張循塗傾兮永懷傷賢不肖兮非彼天何壽

天兮樛櫟偏於呼欽止兮材行雖不施有遺思兮
無窮期

翰林院檢討廖君墓表

嗚呼余讀甘棠之詩而知古之人善政遺結於人
心久而益著愈遠而不忘也然豈多有哉予友廖
君敬先奉詔起修高皇帝實錄既至而事畢上曰
此老儒即以爲翰林檢討余退以告同官曾君曰
章王君汝玉梁君用行皆舉手加額曰昔吾縣之
父母也問之曰豈弟哉古人不是過也廖君卒於
官三君子哭之尤慟嗚呼好禮君子者或不恤小

人善撫微賤者或驕於士大夫方以在上者或好諛而佞已爲守則易尉而爲尉則凌守也惟豈弟者庶幾無是也豈不可稱偉人也哉廖君之爲縣也其禮於士大夫君子可見矣其初爲丞懷慶之河內地當西北之衝邑小事煩又當新附軍旅所過供具浩穰縣令久闕積不治君時年尚少也不數月政成郡守王興宗宿望老成然嚴難事大歎獎以爲不可及縣清化鎮商稅多陷匿布政司官來捕執其首爲奸狀事連千餘家徵捕鉅萬不能足遂以委君君視百姓如家也區畫貧富相補不

數日足其所徵逋布政司官大善更置酒爲謝而去君考滿既垂髮戴白拜送道路多至垂涕者既至京師時方以蘇州爲難治而屬縣吳江尤號繁劇朝廷謂君及興宗俱有名也廼以興宗守蘇州而君丞吳江興宗遇劇務輒以委君君不得專治吳江也時有富民二氏以水決圩田事數年訟不已至聞朝廷下有司督其理屈者某氏修廢圩岸幾數十里岸廢決已數年上下高深數十尺彌望水決無迹可求而某氏又以富聞天下興宗謂使他人督之將爲其賄所溺事不集又煩朝廷遂以

語嘗他官他官亦皆恐懼莫敢往興宗大言曰宜
莫如廖縣丞也君欣然往督其役爲之方法巧思
出人意表如期而畢某氏亦深德君惟拜謝而已
不敢發一言君精敏絕倫吏抱文案叢雜手署口
訣頃刻而畢令簿拱手歎服未嘗疾言遽色而使
民皆不忍欺興宗值考滿當去老稚遮道去不得
行君後坐爲人連累謫鳳陽河內吳江之民就視
之背項相望於道其居者夜則焚香祝之爲之祈
福人或問之曰君何以能得人心如此也曰吾不
知也吾視百姓猶吾子耳嗚呼茲非但鼓舞有才

者之所能也君諱欽以字顯宋御史中丞剛之裔
七世祖謙字益仲受學於朱子之門仕爲吉水縣
尉因家於縣之東溪高祖彥翁曾祖季崇祖明德
世爲士父觀字觀民始居於鄉之雙峯下號退省
卓然獨行之君子也自言平生未嘗對俗人一飯
與予先君子交最好篤於教子積書至多君爲兒
時從先叔父刑部公學易君之弟敬存亦從學競
爽刑部公歎此廖氏雙明月珠也君又從羅如簞
先生受詩經名譽日起國初兄弟俱應江西進士
舉不中君召試京師優等歷仕南北聞見充拓詩

歌清麗而時發其竒雄文章典雅屢考試貢舉川
廣之人士莫不謂君爲藻鑑權衡也君之季弟敬
已剛介寡合特與予善而君諸子自勤自廉兄弟
嘗仕而休也予與黃季岳兄弟過其家焚香看圖
畫月明飲酒庭中徙倚竹樹下出浴溪水中行歌
相答及君奉詔復起以永樂元年拜翰林之命予
幸同官昕夕相見自勤復爲蜀府紀善來巧相值
談笑論舊頗仰湏臾而君遽以微疾不起萬古永
訣夫在常情如何其可悲也君自拜命以來既修
文獻大成日務纂書業而未就以二年四月朔得

疾寓會同館先是予齋宿與坐夜語其孫祖環侍側忽謂予曰是子聰敏可教惜吾恐不見其成立也迨四月十日夜遂歿享年六十有三妻王氏士族有懿德子男四人長自公省親於冀北道卒子嘗爲之作傳次自勤自廉自謹皆儒雅自勤英偉善談論知名當世自廉力學善爲詩五月得訃告即涉大水來迎君柩歸葬於鄉山之原且奉狀乞爲之表將刻石揭之其墓君有女適陳伯瑋胡方來有孫祖環祖田祖歸祖歡祖興世有庇賴也已於戲嘗聞君孝友篤至爲弟受罪自誣服感動獄

吏爲之垂涕泣天子初見時問所經見即以民疾苦對故能膺天子寵眷其卒也遣醫勞問歎息之而吾黨之士皆痛惜之他日史館官不傳之孝友必傳之循吏也

麟極藍先生墓表

高皇帝建都察院專治刑獄藍公子貞及詹徽爲都御使未幾徽專任而子貞左遷漳州推官高皇帝慰諭而遣之幾月而漳州獄空屬縣南靖爲山賊焚劫而縣以民反聞軍衛將出兵屠之公力請止單騎臨視得其狀白免獲全數萬人公既沒十

有餘年而其子曰省請予表其墓嗚呼是非直道
陰德故耶其世系百行翰林胡公光大銘已詳不
復贅爲之詩俾讀而歌思之詩曰

藍君中山自唐家吉宋季勤王連嫔帝室烈烈文
山忠貫日月研席深交矢死鉞有孫萬宇是曰
瑞軒義質早凋篤慶後昆顯赫麟極瑞軒元孫少
失怙恃克由仁義慈訓成之祖母王氏而亦盛宗
澤流無紀天假續之迪其敏聰洞究經旨旁博經
史夕惕惟寅不慕青紫弱冠遇亂扶攜奔竄主於
仁里橫經講貫賊不忍兵幾至化成匹休古史善

解文彙公集 卷十二
效有徵天朝洽一歸安其家益衍其學金輝丹華
三徵七辟詔書旁午翻然振志教於大府撫民奕
奕靡有親炙教成浩歸茲欲斂迹初志弗成高皇
特旨召擢重官朝綱以明進退從容識邪與正天
語丁寧海濱用靖隱德所覃活者數萬卓然不磨
有讀母慢

章江劉先生墓表

吉水章江劉先生既歿之後十有七年其孫宗平
爲翰林檢討將刻石爲揭於其墓之原俾後之學
有所考也縉之家學傳於東山楊先生靜春劉先